

Taittirīya-Brāhmaṇa

Book 2, Chapter 6

Edited by Subramania Sarma, Chennai

Final proofread version, 1st April 2005

[[2-6-1-1]]

स्वा॒द्वीं त्वा॑ स्वा॒दुना॑ ।

ती॒व्रां ती॒व्रेण॑ ।

अ॒मृता॑म॒मृते॑न ।

मधु॑मतीं॒ मधु॑मता ।

सृ॒जामि॒ सꣳसोमे॑न ।

सोमो॑ऽस्य॒श्विभ्या॑ पच्यस्व ।

सर॑स्वत्यै पच्यस्व ।

इन्द्रा॑य सु॒त्राम्णे॑ पच्यस्व ।

परी॒तो षि॒ञ्चता॑ सु॒तम् ।

सोमो॑ य उ॒त्तमꣳ ह॒विः ॥ १ ॥

[[2-6-1-2]]

द॒धन्वा॑ यो न॒र्यो॑ अ॒प्स्वन्तरा॑ ।

सु॒षाव॑ सोम॒मद्रि॑भिः ।

पु॒नातु॑ ते परि॒स्रुत॑म् ।

सोमꣳ॑ सूर्य॑स्य दुहि॒ता ।

वा॒रेण॑ शश्व॑ता॒ तना॑ ।

वा॒युः पू॒तः प॒वित्रे॑ण ।

प्राङ्॒रक्सोमो॑ अति॑द्रुतः ।

इन्द्र॑स्य॒ युज्यः॑ सखा॑ ।

वा॒युः पू॒तः प॒वित्रे॑ण ।

प्र॒त्यङ्॒रक्सोमो॑ अति॑द्रुतः ॥ २ ॥

[[2-6-1-3]]

इन्द्र॑स्य॒ युज्यः॑ सखा॑ ।

ब्रह्म क्षत्रं पवते तेज इन्द्रियम्।
 सुरया सोमः सुत आसुतो मदाय।
 शुक्रेण देव देवताः पिपृग्धि।
 रसेनान्नं यजमानाय धेहि।
 कुविदङ्ग यवमन्तो यवं चित्।
 यथा दान्त्यनुपूर्वं वियूय।
 इहेहैषां कृणुत भोजनानि।
 ये बर्हिषो नमोवृक्तिं न जग्मुः।
 उपयामगृहीतोऽस्यश्विभ्यां त्वा जुष्टं गृह्णामि ॥ ३ ॥

[[2-6-1-4]]

सरस्वत्या इन्द्राय सुत्राम्णौ।
 एष ते योनिस्तेजसे त्वा।
 वीर्याय त्वा बलाय त्वा।
 तेजोऽसि तेजो मयि धेहि।
 वीर्यमसि वीर्यं मयि धेहि।
 बलमसि बलं मयि धेहि।
 नाना हि वा देवहितं सदः कृतम्।
 मा सःसृक्षाथां परमे व्योमन्।
 सुरा त्वमसि शुष्मिणी सोम एषः।
 मा मा हिंसीः स्वां योनिमाविशन् ॥ ४ ॥

[[2-6-1-5]]

उपयामगृहीतोऽस्याश्विनं तेजः।
 सारस्वतं वीर्यम्।
 ऐन्द्रं बलम्।
 एष ते योनिर्मोदाय त्वा।
 आनन्दाय त्वा महसे त्वा।
 ओजोऽस्योजो मयि धेहि।
 मन्युरसि मन्युं मयि धेहि।
 महोऽसि महो मयि धेहि।

सहोऽसि सहो मयि धेहि।
 या व्याघ्रं विषूचिका।
 उभौ वृकं च रक्षति।
 श्येनं पतत्रिणं सिंहम्।
 सेमं पात्वहंसः।
 संपृचः स्थ सं मा भद्रेण पृङ्क।
 विपृचः स्थ वि मा पाप्मना पृङ्क ॥ ५ ॥
 हविः प्रत्यङ्खसोमो अतिद्रुतो गृह्याम्याविशन्विषूचिका पञ्च च ॥ १ ॥

[[2-6-2-1]]

सोमो राजाऽमृतं सुतः।
 ऋजीषेणाजहान्मृत्युम्।
 ऋतेन सत्यमिन्द्रियम्।
 विपानं शुक्रमन्धसः।
 इन्द्रस्येन्द्रियम्।
 इदं पयोऽमृतं मधु।
 सोममद्भ्यो व्यपिबत्।
 छन्दसा हंसः शुचिषत्।
 ऋतेन सत्यमिन्द्रियम्।
 अद्भ्यः क्षीरं व्यपिबत् ॥ १ ॥

[[2-6-2-2]]

कुङ्कुङ्गिरसो धिया।
 ऋतेन सत्यमिन्द्रियम्।
 अन्नात्परिस्तुतो रसम्।
 ब्रह्मणा व्यपिबत्क्षत्त्रम्।
 ऋतेन सत्यमिन्द्रियम्।
 रेतो मूत्रं विजहाति।
 योनिं प्रविशदिन्द्रियम्।
 गर्भो जरायुणाऽऽवृतः।
 उल्बं जहाति जन्मना।

ऋतेन सत्यमिन्द्रियम् ॥ २ ॥

[[2-6-2-3]]

वेदेन रूपे व्यकरोत्।

सतासती प्रजापतिः।

ऋतेन सत्यमिन्द्रियम्।

सोमेन सोमौ व्यपिबत्।

सुतासुतौ प्रजापतिः।

ऋतेन सत्यमिन्द्रियम्।

दृष्ट्वा रूपे व्याकरोत्।

सत्यानृते प्रजापतिः।

अश्रद्धामनृतेऽदधात्।

श्रद्धां सत्ये प्रजापतिः।

ऋतेन सत्यमिन्द्रियम्।

दृष्ट्वा परिस्त्रुतो रसम्।

शुक्रेण शुक्रं व्यपिबत्।

पयः सोमं प्रजापतिः।

ऋतेन सत्यमिन्द्रियम्।

विपानं शुक्रमन्धसः।

इन्द्रस्येन्द्रियम्।

इदं पयोऽमृतं मधु ॥ ३ ॥

अद्ध्यः क्षीरं व्यपिबज्जन्मनर्तेन सत्यमिन्द्रियं श्रद्धां सत्ये प्रजापतिरष्टौ च ॥ २ ॥

सोमो राजा विपानं सोममद्ध्योऽन्नाद्रेतो मूत्रं वेदेन सतासती सोमेन सुतासुतौ दृष्ट्वा रूपे दृष्ट्वा परिस्त्रुता रसं विपानं दश ॥

[[2-6-3-1]]

सुरावन्तं बर्हिषदं सुवीरम्।

यज्ञं हिन्वन्ति महिषा नमोभिः।

दधानाः सोमं दिवि देवतासु।

मदेमेन्द्रं यजमानाः स्वर्काः।

यस्ते रसः संभृत ओषधीषु।

सोमस्य शुष्मः सुरया सुतस्य।
तेन जिन्व यजमानं मदेन।
सरस्वतीमश्विनाविन्द्रमग्निम्।
यमश्विना नमुचेरासुरादधि।
सरस्वत्यसनोदिन्द्रियाय ॥ १ ॥

[[2-6-3-2]]

इमं तꣳ शुक्रं मधुमन्तमिन्दुम्।
सोमꣳ राजानमिह भक्षयामि।
यदत्र रिप्तꣳ रसिनः सुतस्य।
यदिन्द्रो अपिबच्छचीभिः।
अहं तदस्य मनसा शिवेन।
सोमꣳ राजानमिह भक्षयामि।
पितृभ्यः स्वधाविभ्यः स्वधा नमः।
पितामहेभ्यः स्वधाविभ्यः स्वधा नमः।
प्रपितामहेभ्यः स्वधाविभ्यः स्वधा नमः।
अक्षन्पितरः ॥ २ ॥

[[2-6-3-3]]

अमीमदन्त पितरः।
अतीतृपन्त पितरः।
अमीमृजन्त पितरः।
पितरः शुन्धध्वम्।
पुनन्तु मा पितरः सोम्यासः।
पुनन्तु मा पितामहाः।
पुनन्तु प्रपितामहाः।
पवित्रेण शतायुषा।
पुनन्तु मा पितामहाः।
पुनन्तु प्रपितामहाः ॥ ३ ॥

[[2-6-3-4]]

पवित्रेण शतायुषा।

विश्वमायुर्व्यंश्वै।
 अग्न आयूँषि पवसेऽग्ने पवस्व।
 पवमानः सुवर्जनः पुनन्तु मा देवजनाः।
 जातवेदः पवित्रवद्यत्ते पवित्रमर्चिषि।
 उभाभ्यां देव सवितर्वैश्वदेवी पुनती।
 ये समानाः समनसः।
 पितरो यमराज्यै।
 तेषां लोकः स्वधा नमः।
 यज्ञो देवेषु कल्पताम् ॥ ४ ॥

[[2-6-3-5]]

ये सजाताः समनसः।
 जीवा जीवेषु मामकाः।
 तेषां श्रीर्मयि कल्पताम्।
 अस्मिँल्लोके शतं समाः।
 द्वे स्रुती अश्रुणवं पितृणाम्।
 अहं देवानामुत मर्त्यानाम्।
 याभ्यामिदं विश्वमेजत्समेति।
 यदन्तरा पितरं मातरं च।
 इदं हविः प्रजननं मे अस्तु।
 दशवीरं सर्वगणं स्वस्तये।
 आत्मसनि प्रजासनि।
 पशुसन्यभयसनि लोकसनि।
 अग्निः प्रजां बहुलां मे करोतु।
 अन्नं पयो रेतौ अस्मासु धत्त।
 रायस्पोषमिषमूर्जमस्मासु दीधरत्स्वाहा ॥ ५ ॥
 इन्द्रियाय पितरः शतायुषा पुनन्तु मा पितामहाः पुनन्तु प्रपितामहाः कल्पतां स्वस्तये पञ्च च ॥ ३ ॥

[[2-6-4-1]]

सीसेन तन्न मनसा मनीषिणः।
 उर्णासूत्रेण कवयो वयन्ति।

अ॒श्विना॑ य॒ज्ञꣳ स॒विता॑ सर॒स्वती॑ ।
 इन्द्र॑स्य रू॒पं वरु॑णो भिष॒ज्यन् ।
 तद॑स्य रू॒पम॑मृ॒तꣳ श॒चीभिः॑ ।
 ति॒स्रो द॑धु॒र्देवताः॑ सꣳर॒राणाः॑ ।
 लो॒मानि॑ श॒र्ष्वैर्ब॒हुधा॑ न तो॒क्त्रभिः॑ ।
 त्वग॑स्य माꣳस॒मभव॑न्न ला॒जाः ।
 तद॒श्विना॑ भिष॒जा रू॒द्रव॑र्तनी ।
 सर॑स्वती व॒यति॑ पेशो॒ अन्तरः॑ ॥ १ ॥

[[2-6-4-2]]

अस्थि॑ म॒ज्जानं॑ मा॒सरैः॑ ।
 का॒रोत॑रेण॒ दध॑तो॒ गवा॑ त्व॒चि ।
 सर॑स्वती॒ मन॑सा॒ पेश॑लं व॒सु ।
 नास॑त्याभ्यां व॒यति॑ दर्श॒तं व॑पुः ।
 रसं॑ परि॒स्रुता॑ न रो॒हितम् ।
 न॒ग्नहु॒र्धीर॑स्त॒सरं॑ न वे॒म ।
 पय॑सा शु॒क्रम॑मृ॒तं ज॒नित्र॑म् ।
 सुर॑या॒ मूत्रा॑ज्जन॒यन्ति॑ रेतः ।
 अपा॑मतिं॒ दुर्म॑तिं बा॒धमा॑नाः ।
 ऊ॒व॒ध्यं वा॒तꣳ स॒बुवं॑ तदा॒रात् ॥ २ ॥

[[2-6-4-3]]

इन्द्रः॑ सु॒त्रामा॑ हृ॒दये॑न स॒त्यम् ।
 पु॒रोडा॑शेन स॒विता॑ ज॒जान॑ ।
 यकृ॑त्क्लो॒मानं॑ वरु॒णो भिष॑ज्यन् ।
 म॒तस्त्रे॑ वा॒यव्यै॑र्न मि॒नाति॑ पि॒त्तम् ।
 आ॒न्त्राणि॑ स्था॒ली म॒धु पि॑न्व॒माना॑ ।
 गु॒दा पा॑त्राणि सु॒दुघा॑ न धे॒नुः ।
 श्ये॑नस्य॒ पत्रं॑ न प्ली॒हा श॒चीभिः॑ ।
 आ॒स॒न्दी नाभि॑रु॒दरं॑ न मा॒ता ।
 कु॒म्भो व॑नि॒ष्ठुर्ज॑नि॒ता श॒चीभिः॑ ।

यस्मिन्नग्रे योन्यां गर्भो अन्तः ॥ ३ ॥

[[2-6-4-4]]

प्लाशीर्व्यक्तः शतधार उत्सः ।
दुहे न कुम्भीः स्वधां पितृभ्यः ।
मुखः सदस्य शिर इत्सदेन ।
जिह्वा पवित्रमश्विना सः सरस्वती ।
चप्यं न पायुर्भिषगस्य वालः ।
वस्तिर्न शोपो हरसा तरस्वी ।
अश्विभ्यां चक्षुरमृतं ग्रहाभ्याम् ।
छागेन तेजो हविषा श्रुतेन ।
पक्ष्माणि गोधूमैः क्लैरुतानि ।
पेशो न शुक्लमसितं वसाते ॥ ४ ॥

[[2-6-4-5]]

अविर्न मेषो नसि वीर्याय ।
प्राणस्य पन्था अमृतो ग्रहाभ्याम् ।
सरस्वत्युपवाकैर्व्यानम् ।
नस्यानि बर्हिर्बदरैर्जजान ।
इन्द्रस्य रूपमृषभो बलाय ।
कणभ्याः श्रोत्रममृतं ग्रहाभ्याम् ।
यवा न बर्हिर्भ्रुवि केसराणि ।
कर्कन्धुं जज्ञे मधुं सारघं मुखात् ।
आत्मन्नुपस्थे न वृकस्य लोमं ।
मुखे श्मश्रूणि न व्याघ्रलोमम् ॥ ५ ॥

[[2-6-4-6]]

केशा न शीर्षन्यशसे श्रियै शिखा ।
सिंहस्य लोम त्विषिरिन्द्रियाणि ।
अङ्गान्यात्मन्भिषजा तदश्विना ।
आत्मानमङ्गैः समधात्सरस्वती ।
इन्द्रस्य रूपः शतमानमायुः ।

च॒न्द्रेण॑ ज्योति॑र॒मृतं॑ दधा॑ना।
 सर॑स्वती॒ योन्यां॑ गर्भ॑मन्तः।
 अ॒श्विभ्यां॑ पत्नी॒ सुकृतं॑ विभर्ति।
 अ॒पाꣳ रसे॑न वरु॑णो न साम्ना॑।
 इन्द्र॑ꣳ श्रियै॒ जनय॑न्नप्सु राजा॑।
 तेजः॑ प॒शूनाꣳ ह॒विरिन्द्रि॑यावत्।
 परि॑स्रुता॒ पर्यसा॑ सार॒घं मधु॑।
 अ॒श्विभ्यां॑ दु॒ग्धं भि॑षजा॒ सर॑स्वत्या सुता॒सुताभ्या॑म्।
 अ॒मृतः॑ सोम॒ इन्दुः॑ ॥ ६ ॥
 अन्तर॑ आ॒राद॒न्तर्वसा॑ते व्याघ्र॒लोमꣳ राजा॑ च॒त्वारि॑ च ॥ ४ ॥

[[2-6-5-1]]

मि॒त्रोऽसि॑ वरु॑णोऽसि।
 सम॒हं वि॑श्वे॒र्देवैः॑।
 क्ष॒त्तस्य॑ नाभिरसि।
 क्ष॒त्तस्य॑ योनिरसि।
 स्यो॒ना मा सी॑द।
 सु॒षदा॑ मा सी॑द।
 मा त्वा॑ हिꣳसीत्।
 मा मा॑ हिꣳसीत्।
 निष॑साद धृ॒तव्र॑तो वरु॑णः।
 प॒स्त्या॑स्वा ॥ १ ॥

[[2-6-5-2]]

साम्ना॑ज्याय सु॒क्रतुः॑।
 दे॒वस्य॑ त्वा सवि॒तुः प्र॑सवे।
 अ॒श्विनो॑र्बा॒हुभ्या॑म्।
 पू॒ष्णो ह॑स्ता॒भ्याम्।
 अ॒श्विनो॑र्भैष॒ज्येन॑।
 तेज॑से ब्रह्मवर्च॒साया॒भिषि॑ञ्चामि।
 दे॒वस्य॑ त्वा सवि॒तुः प्र॑सवे।

अ॒श्विनो॑र्बा॒हुभ्या॑म् ।
पू॒ष्णो ह॑स्ता॒भ्याम् ।
सर॑स्वत्यै॒ भैष॑ज्येन ॥ २ ॥

[[2-6-5-3]]

वी॒र्या॑या॒न्नाद्या॑या॒भिषि॑ञ्चामि ।
दे॒वस्य॑ त्वा स॒वितुः॑ प्र॒सवे॑ ।
अ॒श्विनो॑र्बा॒हुभ्या॑म् ।
पू॒ष्णो ह॑स्ता॒भ्याम् ।
इन्द्र॑स्येन्द्रि॒येण॑ ।
श्रि॒यै यश॑से॒ बला॑या॒भिषि॑ञ्चामि ।
को॑ऽसि क॒तमो॑ऽसि ।
कस्मै॑ त्वा का॒यं त्वा॑ ।
सु॒श्लोकाँ॑ऽ सु॒मङ्ग॑लाँ॑ऽ स॒त्यरा॒जा३न् ।
शिरो॑ मे॒ श्रीः ॥ ३ ॥

[[2-6-5-4]]

यशो॑ मु॒खम् ।
त्विषिः॑ केशा॑श्च॒ श्मश्रू॑णि ।
राजा॑ मे प्रा॒णोऽमृ॑तम् ।
स॒म्राड्भुः॑ ।
वि॒राट्छ्रो॑त्रम् ।
जि॒ह्वा मे॑ भ॒द्रम् ।
वाङ्म॑हः ।
मनो॑ म॒न्युः ।
स्व॒राङ्ग॑मः ।
मोदाः॑ प्र॒मोदा॑ अ॒ङ्गुली॑र॒ङ्गानि॑ ॥ ४ ॥

[[2-6-5-5]]

चि॒त्तं मे॒ सहः॑ ।
बा॒हू मे॒ बल॑मिन्द्रि॒यम् ।
ह॒स्तौ मे॒ कर्म॑ वी॒र्य॑म् ।

आत्मा क्षत्रमुरो मम ।
पृथीर्मे राष्ट्रमुदरमसौ ।
ग्रीवाश्च श्रोण्यौ ।
ऊरू अरत्नी जानुनी ।
विशो मेऽङ्गानि सर्वतः ।
नाभिर्मे चित्तं विज्ञानम् ।
पायुर्मेऽपचितिर्भसत् ॥ ५ ॥

[[2-6-5-6]]

आनन्दनन्दावाण्डौ मे ।
भगः सौभाग्यं पसः ।
जङ्घाभ्यां पद्भ्यां धर्मोऽस्मि ।
विशि राजा प्रतिष्ठितः ।
प्रतिक्षत्त्वे प्रतितिष्ठामि राष्ट्रे ।
प्रत्यश्वेषु प्रतितिष्ठामि गोषु ।
प्रत्यङ्गेषु प्रतितिष्ठाम्यात्मन ।
प्रतिप्राणेषु प्रतितिष्ठामि पुष्टे ।
प्रतिद्यावापृथिव्योः ।
प्रतितिष्ठामि यज्ञे ॥ ६ ॥

[[2-6-5-7]]

त्रया देवा एकादश ।
त्रयस्त्रिंशाः सुरार्धसः ।
बृहस्पतिपुरोहिताः ।
देवस्य सवितुः सवे ।
देवा देवैरवन्तु मा ।
प्रथमा द्वितीयैः ।
द्वितीयास्तृतीयैः ।
तृतीयाः सत्येन ।
सत्यं यज्ञेन ।
यज्ञो यजुर्भिः ॥ ७ ॥

[[2-6-5-8]]

यजूंषि सामभिः ।

सामान्यृग्भिः ।

ऋचो याज्याभिः ।

याज्या वषट्कारैः ।

वषट्कारा आहुतिभिः ।

आहुतयो मे कामान्त्समर्धयन्तु ।

भूः स्वाहा ।

लोमानि प्रयतिर्मम ।

त्वङ्म आनतिरागतिः ।

मांसं म उपनतिः ।

वस्वस्थि ।

मज्जा म आनतिः ॥ ८ ॥

पस्त्यास्वा सरस्वत्यै भैषज्येन श्रीरङ्गानि भसद्यज्ञे यज्ञो यजुर्भिरुपनतिर्द्वे च ॥ ५ ॥

[[2-6-6-1]]

यद्देवा देवहेडनम् ।

देवासश्चकृमा वयम् ।

अग्निर्मा तस्मादेनसः ।

विश्वान्मुञ्चत्वहंसः ।

यदि दिवा यदि नक्तम् ।

एनांसि चकृमा वयम् ।

वायुर्मा तस्मादेनसः ।

विश्वान्मुञ्चत्वहंसः ।

यदि जाग्रद्यदि स्वप्ने ।

एनांसि चकृमा वयम् ॥ १ ॥

[[2-6-6-2]]

सूर्यो मा तस्मादेनसः ।

विश्वान्मुञ्चत्वहंसः ।

यद्गामे यदरण्ये ।

यत्सभायां यदिन्द्रिये।
यच्छूद्रे यदर्यै।
एनश्चकृमा वयम्।
यदेकस्याधि धर्मणि।
तस्यावयजनमसि।
यदापो अघ्निया वरुणेति शपामहे।
ततो वरुण नो मुञ्च ॥ २ ॥

[[2-6-6-3]]

अवभृथ निचङ्कुण निचेरुरसि निचङ्कुण।
अव देवैर्देवकृतमेनोऽयाट्।
अव मर्त्यैर्मर्त्यकृतम्।
उरोरा नो देव रिषस्पाहि।
सुमित्रा न आप ओषधयः सन्तु।
दुर्मित्रास्तस्मै भयासुः।
योऽस्मान्द्वेष्टि।
यं च वयं द्विष्मः।
द्रुपदादिवेन्मुमुचानः।
स्विन्नः स्नात्वी मलादिव ॥ ३ ॥

[[2-6-6-4]]

पूतं पवित्रेणेवाज्यम्।
आपः शुन्धन्तु मैनसः।
उद्वयं तमसस्परि।
पश्यन्तो ज्योतिरुत्तरम्।
देवं देवत्रा सूर्यम्।
अगन्म ज्योतिरुत्तमम्।
प्रतियुतो वरुणस्य पाशः।
प्रत्यस्तो वरुणस्य पाशः।
एधोऽस्येधिषीमहि।
समिदसि ॥ ४ ॥

[[2-6-6-5]]

तेजोऽसि तेजो मयि धेहि ।

अपो अन्वचारिषम् ।

रसेन समसृक्ष्महि ।

पयस्वाँ अग्न आगमम् ।

तं मा सःसृज वर्चसा ।

प्रजया च धनेन च ।

समाववर्ति पृथिवी ।

समुषाः ।

समु सूर्यः ।

समु विश्वामिदं जगत् ।

वैश्वानर ज्योतिर्भूयासम् ।

विभुं कामं व्यश्नवै ।

भूः स्वाहा ॥ ५ ॥

स्वप्न एनाऽसि चकृमा वयं मुञ्च मलादिव समिदसि जगत्क्षीणि च ॥ ६ ॥

[[2-6-7-1]]

होता यक्षत्समिधेन्द्रमिडस्पदे ।

नाभा पृथिव्या अधि ।

दिवो वर्ष्मन्त्समिध्यते ।

ओजिष्ठश्चर्षणीसहान् ।

वेत्वाज्यस्य होतर्यज ।

होता यक्षत्तनूनपातम् ।

ऊतिभिर्जेतारमपराजितम् ।

इन्द्रं देवः सुवर्दिदम् ।

पथिभिर्मधुमत्तमैः ।

नराशःसेन तेजसा ॥ १ ॥

[[2-6-7-2]]

वेत्वाज्यस्य होतर्यज ।

होता यक्षदिडाभिरिन्द्रमीडितम् ।

आजुहानममर्त्यम्।
देवो देवैः सर्वीर्यः।
वज्रहस्तः पुरंदरः।
वेत्वाज्यस्य होतर्यज।
होता यक्षद्वर्हिषीन्द्रं निषद्वरम्।
वृषभं नर्यापसम्।
वसुभी रुद्रैरादित्यैः।
सयुग्भिर्बर्हिरासदत् ॥ २ ॥

[[2-6-7-3]]

वेत्वाज्यस्य होतर्यज।
होता यक्षदोजो न वीर्यम्।
सहो द्वार इन्द्रमवर्धयन्।
सुप्रायणा विश्रयन्तामृतावृधः।
द्वार इन्द्राय मीढुषै।
वियन्त्वाज्यस्य होतर्यज।
होता यक्षदुषे इन्द्रस्य धेनू।
सुदुघे मातरौ मही।
सवातरौ न तेजसी।
वत्समिन्द्रमवर्धताम् ॥ ३ ॥

[[2-6-7-4]]

वीतामाज्यस्य होतर्यज।
होता यक्षद्वैवया होतारा।
भिषजा सखाया।
हविषेन्द्रं भिषज्यतः।
कवी देवौ प्रचेतसौ।
इन्द्राय धत्त इन्द्रियम्।
वीतामाज्यस्य होतर्यज।
होता यक्षत्तिस्रो देवीः।
त्रयस्त्रिधातवोऽपसः।

इडा सरस्वती भारती ॥ ४ ॥

[[2-6-7-5]]

महीन्द्रपत्नीर्हविष्मतीः ।
वियन्त्वाज्यस्य होतर्यज ।
होता यक्षत्त्वष्टारमिन्द्र देवम् ।
भिषजं सुयजं घृतश्रियम् ।
पुरु रूपं सुरेतसं मघोनिम् ।
इन्द्राय त्वष्टा दधदिन्द्रियाणि ।
वेत्वाज्यस्य होतर्यज ।
होता यक्षद्वनस्पतिम् ।
शमितारं शतक्रतुम् ।
धियो जोष्टारमिन्द्रियम् ॥ ५ ॥

[[2-6-7-6]]

मध्वा समञ्जन्पथिभिः सुगेभिः ।
स्वदाति हव्यं मधुना घृतेन ।
वेत्वाज्यस्य होतर्यज ।
होता यक्षदिन्द्रं स्वाहाऽऽज्यस्य ।
स्वाहा मेदसः ।
स्वाहा स्तोकानाम् ।
स्वाहा स्वाहाकृतीनाम् ।
स्वाहा हव्यसूक्तीनाम् ।
स्वाहा देवां आज्यपान् ।
स्वाहेन्द्रं होत्राजुषाणाः ।
इन्द्र आज्यस्य वियन्तु ।
होतर्यज ॥ ६ ॥

तेजसाऽऽसददवर्धतां भारतीन्द्रियं जुषाणा द्वे च ॥ ७ ॥

समिधेन्द्रं तनूनपातमिडाभिर्बर्हिशयोज उषे दैव्या तिस्रस्त्वष्टारं वनस्पतिमिन्द्रम् । समिधेन्द्रं चतुर्वेत्वेकौ वियन्तु द्विर्वीतामेकौ वियन्तु द्विर्वेत्वेकौ वियन्तु होतर्यज ॥

[[2-6-8-1]]

समिद्ध इन्द्र उषसामनीके ।
 पुरोरुचा पूर्वकृद्वावृधानः ।
 त्रिभिर्देवैस्त्रिंशता वज्रबाहुः ।
 जघान वृत्रं वि दुरो ववार ।
 नराशंसः प्रति शूरो मिमानः ।
 तनूनपात्प्रति यज्ञस्य धाम ।
 गोभिर्वपावान्मधुना समञ्जन् ।
 हिरण्यैश्चन्द्री यजति प्रचेताः ।
 ईडितो देवैर्हरिवाꣳ अभिष्टिः ।
 आजुहानो हविषा शर्धमानः ॥ १ ॥

[[2-6-8-2]]

पुरंदरो मघवान्वज्रबाहुः ।
 आयातु यज्ञमुप नो जुषाणः ।
 जुषाणो बर्हिर्हरिवान् इन्द्रः ।
 प्राचीनꣳ सीदत्प्रदिशा पृथिव्याः ।
 उरुव्यचाः प्रथमानꣳ स्योनम् ।
 आदित्यैरक्तं वसुभिः सजोषाः ।
 इन्द्रं दुरः कवष्यो धावमानाः ।
 वृषाणं यन्तु जनयः सुपत्नीः ।
 द्वारो देवीरभितो विश्रयन्ताम् ।
 सुवीरा वीरं प्रथमाना महोभिः ॥ २ ॥

[[2-6-8-3]]

उषासा नक्ता बृहती बृहन्ताम् ।
 पयस्वती सुदुघे शूरमिन्द्रम् ।
 पेशस्वती तन्तुना संव्ययन्ती ।
 देवानां देवं यजतः सुरुक्मे ।
 दैव्या मिमाना मनसा पुरुत्रा ।
 होताराविन्द्रं प्रथमा सुवाचा ।
 मूर्धन्यज्ञस्य मधुना दधाना ।

प्राचीनं ज्योतिर्हविषा वृधातः ।
तिस्रो देवीर्हविषा वर्धमानाः ।
इन्द्रं जुषाणा वृषणं न पत्नीः ॥ ३ ॥

[[2-6-8-4]]

अच्छिन्नं तन्तुं पयसा सरस्वती ।
इडा देवी भारती विश्वतीर्तिः ।
त्वष्टा दधदिन्द्राय शुष्मम् ।
अपाकोऽर्चिष्टुर्यशसे पुरूणि ।
वृषा यजन्वृषणं भूरिरेताः ।
मूर्धन्यज्ञस्य समनक्तु देवान् ।
वनस्पतिरवसृष्टो न पाशैः ।
त्मन्या समञ्जच्छमिता न देवः ।
इन्द्रस्य हव्यैर्जठरं पृणानः ।
स्वदाति हव्यं मधुना घृतेन ।
स्तोकानामिन्दुं प्रति शूर इन्द्रः ।
वृषायमाणो वृषभस्तुराषाट् ।
घृतप्रुषा मधुना हव्यमुन्दन् ।
मूर्धन्यज्ञस्य जुषतां स्वाहा ॥ ४ ॥
शर्धमानो महोभिः पत्नीर्घृतेन चत्वारि च ॥ ८ ॥
इति कृष्णयजुर्वेदीयतैत्तरीयब्राह्मणे द्वितीयाष्टके षष्ठाध्यायेऽष्टमोऽनुवाकः ॥ ८ ॥

[[2-6-9-1]]

आचर्षणि प्रा विवेष यन्मा ।
तं सध्रीचीः ।
सत्यमित्तन्न त्वावां अन्यो अस्ति ।
इन्द्रं देवो न मर्त्यो ज्यायान् ।
अहन्नहि परिशयानमर्णः ।
अवासृजोऽपो अच्छा समुद्रम् ।
प्रससाहिषे पुरुहूत शत्रून् ।
ज्येष्ठस्ते शुष्म इह रातिरस्तु ।

इन्द्राभर॑ दक्षिणेना॒ वसूनि॑ ।
 पतिः॑ सिन्धूनामसि॒ रेवती॑नाम् ।
 स शेवृ॑धमधिधा द्युम॒न्नम॒स्मे ।
 महि॑ क्षत्रं ज॒नाषाडिन्द्र॑ तव्यम् ।
 रक्षा॑ च नो म॒घोनः॑ पा॒हि सू॒रीन् ।
 रा॒ये च॑ नः स्वप॒त्या इ॒षे धाः॑ ॥ १ ॥
 रे॒वती॑नां च॒त्वारि॑ च ॥ ९ ॥

[[2-6-10-1]]

दे॒वं ब॒र्हिरिन्द्र॑ सु॒दे॒वं दे॒वैः ।
 वी॒रव॑त्स्ती॒र्णं वेद्या॑मवर्धयत् ।
 वस्तो॑र्वृतं प्रा॒क्तो॑र्भृतम् ।
 रा॒या ब॒र्हिष्मतो॑ऽत्यगात् ।
 व॒सुवने॑ वसुधेयस्य वे॒तु यज॑ ।
 दे॒वीद्वार॑ इन्द्र॑ संघा॒ते ।
 वि॒द्वीर्या॑मन्नवर्धयन् ।
 आ व॒त्सेन॑ तरुणेन कु॒मारेण॑ च मी॒विता॑ अपा॒र्वाणाम् ।
 रे॒णुक॑काटं नुदन्ताम् ।
 व॒सुवने॑ वसुधेयस्य वियन्तु॒ यज॑ ॥ १ ॥

[[2-6-10-2]]

दे॒वी उ॒षासा॑ नक्ता॑ ।
 इन्द्रं॑ य॒ज्ञे प्र॑यत्य॒हेता॑म् ।
 दै॒वीर्विशः॑ प्राया॒सिष्टा॑म् ।
 सु॒प्रीते॑ सु॒धिते॑ अभूताम् ।
 व॒सुवने॑ वसुधेयस्य वी॒तां यज॑ ।
 दे॒वी जोष्ट्री॑ वसु॒धिते॑ ।
 दे॒वमिन्द्र॑मवर्धताम् ।
 अया॑व्य॒न्याऽघा॑ द्वेषा॑ सि ।
 आऽन्याऽवा॑क्षीद्वसु॒वार्याणि॑ ।
 यज॑मानाय शि॒क्षिते॑ ॥ २ ॥

[[2-6-10-3]]

वसुवने वसुधेयस्य वीतां यज ।
देवी ऊर्जाहुती दुधे सुदुधै ।
पयसेन्द्रमवर्धताम् ।
इषमूर्जमन्याऽवाक्षीत् ।
सग्धिः सपीतिमन्या ।
नवेन पूर्वं दयमाने ।
पुराणेन नवम् ।
अधातामूर्जमूर्जाहुती वसु वार्याणि ।
यजमानाय शिक्षिते ।
वसुवने वसुधेयस्य वीतां यज ॥ ३ ॥

[[2-6-10-4]]

देवा दैव्या होतारा ।
देवमिन्द्रमवर्धताम् ।
हताघशःसावाभाष्टा वसु वार्याणि ।
यजमानाय शिक्षितौ ।
वसुवने वसुधेयस्य वीतां यज ।
देवीस्तिस्त्रस्त्रो देवीः ।
पतिमिन्द्रमवर्धयन् ।
अस्पृक्षद्भारती दिवम् ।
रुद्रैर्यज्ञः सरस्वती ।
इडा वसुमती गृहान् ॥ ४ ॥

[[2-6-10-5]]

वसुवने वसुधेयस्य वियन्तु यज ।
देव इन्द्रो नराशंसः ।
त्रिवरूथस्त्रिवन्धुरः ।
देवमिन्द्रमवर्धयत् ।
शतेन शितिपृष्ठानामाहितः ।
सहस्रेण प्रवर्तते ।

मि॒त्रावरु॑णे॒दस्य॑ हो॒त्रम॑र्ह॒तः ।
बृ॒हस्प॑तिः॒ स्तो॒त्रम् ।
अ॒श्विनाऽऽध्व॑र्यवम् ।
व॒सुवने॑ वसु॒धेय॑स्य वेतु॒ यज॑ ॥ ५ ॥

[[2-6-10-6]]

दे॒व इन्द्रो॑ वन॒स्पतिः॑ ।
हि॒रण्य॑पर्णो॒ मधु॑शाखः सु॒पिप्प॒लः ।
दे॒वमिन्द्र॑मवर्धयत् ।
दि॒वम॑ग्रैणा॒प्रात् ।
आऽन्त॑रि॒क्षं पृथि॒वीम॑दृ॒शीत् ।
व॒सुवने॑ वसु॒धेय॑स्य वेतु॒ यज॑ ।
दे॒वं ब॒र्हिर्वा॑रि॒तीना॑म् ।
दे॒वमिन्द्र॑मवर्धयत् ।
स्वा॒स॒स्थमिन्द्रे॑णा॒सन्न॑म् ।
अ॒न्या ब॒र्हीऽष्य॑भ्यभूत् ।
व॒सुवने॑ वसु॒धेय॑स्य वेतु॒ यज॑ ।
दे॒वो अ॒ग्निः स्वि॑ष्ट॒कृत् ।
दे॒वमिन्द्र॑मवर्धयत् ।
स्वि॑ष्टं कु॒र्वन्ति॑स्वि॒ष्टकृ॑त् ।
स्वि॑ष्टम॒द्य करो॑तु नः ।

व॒सुवने॑ वसु॒धेय॑स्य वेतु॒ यज॑ ॥ ६ ॥

वि॒यन्तु॑ यज॒ शिक्षि॑ते॒ शिक्षि॑ते वसु॒वने॑ वसु॒धेय॑स्य वी॒तां यज॑ गृ॒हान्वे॑तु॒ यजा॑भू॒त्षद् ॥ १० ॥
दे॒वं ब॒र्हिर्दे॒वीर्द्वारो॑ दे॒वी उ॒षासा॑ नक्तो॒ दे॒वी जो॒ष्टी दे॒वी ऊ॒र्जाहु॑ती दे॒वा दै॒व्या हो॑ता॒रा शिक्षि॑तौ
दे॒वीस्ति॑स्त्रस्ति॒स्त्रो दे॒वीः पति॑ दे॒व इन्द्रो॑ नरा॒शऽसो॑ दे॒व इन्द्रो॑ वन॒स्पति॑र्दे॒वं ब॒र्हिर्वा॑रि॒तीनां॑ दे॒वो अ॒ग्निः
स्वि॑ष्ट॒कृद्दे॒वम् ॥

वेतु॑ वि॒यन्तु॑ चतु॒र्वी॑ता॒मेको॑ वि॒यन्तु॑ चतु॒र्वे॑तु । अ॒वर्ध॑य॒दवर्ध॑यन्नि॒रवर्ध॑ता॒मेको॑ऽवर्ध॑य॒श्चतु॑रवर्धयत् ।
वस्तो॑रा व॒त्सेन॑ दै॒वीर॑या॒वीष॑ ह॒तास्पृ॑क्ष॒च्छते॑न दि॒वमिन्द्र॑ऽस्वा॒स॒स्थऽस्वि॑ष्टम् । स्वि॑ष्टऽशिक्षि॒ते
शिक्षि॑ते शिक्षि॒तौ ॥

[[2-6-11-1]]

होता यक्षत्समिधाऽग्निमिडस्पदे।
अश्विनेन्द्रः सरस्वतीम्।
अजो धूम्रो न गोधूमैः क्लैर्भेषजम्।
मधु शष्पैर्न तेज इन्द्रियम्।
पयः सोमः परिस्नुता घृतं मधु।
वियन्त्वाज्यस्य होतर्यज।
होता यक्षत्तनूनपात्सरस्वती।
अविर्मेषो न भेषजम्।
पथा मधुमताऽऽभरन्।
अश्विनेन्द्राय वीर्यम् ॥ १ ॥

[[2-6-11-2]]

बदरैरुपवाकाभिर्भेषजं तोक्त्रभिः।
पयः सोमः परिस्नुता घृतं मधु।
वियन्त्वाज्यस्य होतर्यज।
होता यक्षन्नराशंसं न नग्नहुम्।
पतिः सुरायै भेषजम्।
मेषः सरस्वती भिषक्।
रथो न चन्द्र्याश्विनोर्वपा इन्द्रस्य वीर्यम्।
बदरैरुपवाकाभिर्भेषजं तोक्त्रभिः।
पयः सोमः परिस्नुता घृतं मधु।
वियन्त्वाज्यस्य होतर्यज ॥ २ ॥

[[2-6-11-3]]

होता यक्षदिडेडित आजुह्वानः सरस्वतीम्।
इन्द्रं बलेन वर्धयन्।
ऋषभेण गवैन्द्रियम्।
अश्विनेन्द्राय वीर्यम्।
यवैः कर्कन्धुभिः।
मधु लाजैर्न मासरम्।
पयः सोमः परिस्नुता घृतं मधु।

वि॒यन्त्वा॒ज्यस्य॒ हो॒तर्य॑ज ।
होता॑ यक्ष॒द्वर्हिः॑ सु॒ष्टरी॒मोर्ण॑म्रदाः ।
भि॒षङ्गा॑सत्या ॥ ३ ॥

[[2-6-11-4]]

भि॒षजा॒ऽश्विना॑ऽश्वा शि॒शुम॑ती ।
भि॒षग्धे॒नुः सर॑स्वती ।
भि॒षग्दु॒ह इन्द्रा॑य भेष॒जम् ।
पयः॑ सोमः॑ परि॒स्रुता॑ घृ॒तं मधु॑ ।
वि॒यन्त्वा॒ज्यस्य॒ हो॒तर्य॑ज ।
होता॑ यक्ष॒हुरो॒ दिशः॑ ।
क॒व॒ष्यो न॒ व्यच॑स्वतीः ।
अ॒श्विभ्यां॑ न दुरो॒ दिशः॑ ।
इन्द्रो॑ न रोद॑सी दु॒घै ।
दुहे॑ कामा॒न्त्सर॑स्वती ॥ ४ ॥

[[2-6-11-5]]

अ॒श्विनेन्द्रा॑य भेष॒जम् ।
शु॒क्रं न ज्योति॑रिन्द्रि॒यम् ।
पयः॑ सोमः॑ परि॒स्रुता॑ घृ॒तं मधु॑ ।
वि॒यन्त्वा॒ज्यस्य॒ हो॒तर्य॑ज ।
होता॑ यक्षत्सु॒पेश॑सो॒षे नक्त॑दिवा ।
अ॒श्विना॑ संजाना॒ने ।
सम॑ञ्जाते सर॑स्वत्या ।
त्विषि॑मिन्द्रे न भेष॒जम् ।
श्ये॒नो न रज॑सा हृ॒दा ।
पयः॑ सोमः॑ परि॒स्रुता॑ घृ॒तं मधु॑ ॥ ५ ॥

[[2-6-11-6]]

वि॒यन्त्वा॒ज्यस्य॒ हो॒तर्य॑ज ।
होता॑ यक्ष॒द्वैव्या॒ होतारा॑ भि॒षजा॒ऽश्विना॑ ।
इन्द्रं॑ न जागृ॒वी दिवा॑ नक्तं न भेष॒जैः ।

शूष॑ सर॑स्वती भि॒षक् ।
सीसे॑न दुह इन्द्रि॒यम् ।
पयः॑ सोमः॑ परि॒स्रुता॑ घृ॒तं मधु॑ ।
वि॒यन्त्वाज्य॑स्य॒ हो॒तर्य॑ज ।
होता॑ यक्ष॒त्तिस्रो॑ दे॒वीर्न भेष॑जम् ।
त्रय॑स्त्रि॒धातवो॑ऽपसः ।
रूप॑मिन्द्रे॑ हिर॒ण्यय॑म् ॥

[[2-6-11-7]]

अ॒श्विने॒डा न भार॑ती ।
वा॒चा सर॑स्वती ।
मह॑ इन्द्रा॒य दधुरि॑न्द्रि॒यम् ।
पयः॑ सोमः॑ परि॒स्रुता॑ घृ॒तं मधु॑ ।
वि॒यन्त्वाज्य॑स्य॒ हो॒तर्य॑ज ।
होता॑ यक्ष॒त्त्वष्टार॑मिन्द्र॒मश्वि॑ना ।
भी॒षजं॑ न सर॑स्वतीम् ।
ओजो॑ न जू॒तिरि॑न्द्रि॒यम् ।
वृ॒को न र॑भसो भि॒षक् ।
यशः॑ सुर॒या भेष॑जम् ॥ ७ ॥

[[2-6-11-8]]

श्रि॒या न मा॑सरम् ।
पयः॑ सोमः॑ परि॒स्रुता॑ घृ॒तं मधु॑ ।
वि॒यन्त्वाज्य॑स्य॒ हो॒तर्य॑ज ।
होता॑ यक्ष॒द्वन॑स्पति॑म् ।
श॒मि॒तार॑ः श॒तक्र॑तुम् ।
भी॒मं न म॑न्युः॑ राजा॒नं व्या॒घ्रं नम॑साऽश्वि॒ना भा॑मम् ।
सर॑स्वती भि॒षक् ।
इन्द्रा॒य दुह इन्द्रि॑यम् ।
पयः॑ सोमः॑ परि॒स्रुता॑ घृ॒तं मधु॑ ।
वि॒यन्त्वाज्य॑स्य॒ हो॒तर्य॑ज ॥ ८ ॥

[[2-6-11-9]]

होता यक्षदग्निः स्वाहाऽऽज्यस्य स्तोत्रानाम्।
स्वाहा मेदसां पृथक्।
स्वाहा छागमश्विभ्याम्।
स्वाहा मेषः सरस्वत्यै।
स्वाहर्षभमिन्द्राय सिंहाय सहसेन्द्रियम्।
स्वाहाऽग्निं न भेषजम्।
स्वाहा सोममिन्द्रियम्।
स्वाहेन्द्रः सुत्रामानः सवितारं वरुणं भिषजां पतिम्।
स्वाहा वनस्पतिं प्रियं पाथो न भेषजम्।
स्वहा देवाः आज्यपान् ॥ ९ ॥

[[2-6-11-10]]

स्वाहाऽग्निः होत्राज्जुषाणो अग्निभेषजम्।
पयः सोमः परिस्रुता घृतं मधु।
वियन्त्वाज्यस्य होतर्यज।
होता यक्षदश्विना सरस्वतीमिन्द्रः सुत्रामाणम्।
इमे सोमाः सुरामाणः।
छागैर्न मेषैर्ऋषभैः सुताः।
शष्यैर्न तोक्त्रभिः।
लाजैर्महस्वन्तः।
मदा मासरेण परिष्कृताः।
शुक्राः पयस्वन्तोऽमृताः।
प्रस्थिता वो मधुश्रुतः।
तानश्विना सरस्वतीन्द्रः सुत्रामा वृत्रहा।
जुषन्ताः सौम्यं मधु।
पिबन्तु मदन्तु वियन्तु सोमम्।
होतर्यज ॥ १० ॥
वीर्यं वियन्त्वाज्यस्य होतर्यज नासत्या सरस्वती मधु हिरण्ययं भेषजं वियन्त्वाज्यस्य
होतर्यजाज्यपानमृता पञ्च च ॥ ११ ॥

समिधाऽग्निं षट्। तनूनपात्सप्त। नराशंसमृषिः। इडेडितो यवैरष्टौ। बर्हिः सप्त। दुरोऽश्विना नव।
सुपेशसोषे नक्तमृषिः। दैव्या होतारा सीसैन रसः। तिस्रस्त्वष्टारमष्टावष्टौ। वनस्पतिमृषिः। अग्निं
त्रयोदश। अश्विना द्वादश त्रयोदश ॥

समिधाऽग्निं बदरैर्बदरैर्यवैरश्विना त्विषिमश्विना न भेषजं रूपमश्विना भीमं भामम् ॥

[[2-6-12-1]]

समिद्धो अग्निरश्विना।
तप्तो घर्मो विराट्थसुतः।
दुहे धेनुः सरस्वती।
सोमं शुक्रमिहेन्द्रियम्।
तनूपा भिषजा सुते।
अश्विनोभा सरस्वती।
मध्वा रजांसीन्द्रियम्।
इन्द्राय पथिभिर्वहान्।
इन्द्रायेन्दुं सरस्वती।
नराशंसैन नग्नहुः ॥ १ ॥

[[2-6-12-2]]

अधातामश्विना मधु।
भेषजं भिषजा सुते।
आजुहाना सरस्वती।
इन्द्रायेन्द्रियाणि वीर्यम्।
इडाभिरश्विनाविषम्।
समूर्जं स रयिं दधुः।
अश्विना नमुचेः सुतम्।
सोमं शुक्रं परिस्रुता।
सरस्वती तमाभरत्।
बर्हिषेन्द्राय पातवे ॥ २ ॥

[[2-6-12-3]]

कवष्यो न व्यचस्वतीः।
अश्विभ्यां न दुरो दिशः।

इन्द्रो न रोदसी दुर्घै।
दुहे कामान्त्सरस्वती।
उषासा नक्तमश्विना।
दिवेन्द्रः सायमिन्द्रियैः।
संजानाने सुपेशसा।
समञ्जाते सरस्वत्या।
पातं नो अश्विना दिवा।
पाहि नक्तः सरस्वति ॥ ३ ॥

[[2-6-12-4]]

दैव्या होतारा भिषजा।
पातमिन्द्रः सचा सुते।
तिस्रस्त्रेधा सरस्वती।
अश्विना भारतीडा।
तीव्रं परिस्रुता सोमम्।
इन्द्राय सुषवुर्मदम्।
अश्विना भेषजं मधु।
भेषजं नः सरस्वती।
इन्द्रे त्वष्टा यशः श्रियम्।
रूपः रूपमधुः सुते।
ऋतुथेन्द्रो वनस्पतिः।
शशमानः परिस्रुता।
कीलालमश्विभ्यां मधु।
दुहे घेनुः सरस्वती।
गोभिर्न सोममश्विना।
मासरेण परिष्कृता।
समधाताः सरस्वत्या।
स्वाहेन्द्रे सुतं मधु ॥ ४ ॥
नग्नहुः पातवे सरस्वत्यधुः सुतेऽष्टौ च ॥ १२ ॥

[[2-6-13-1]]

अ॒श्विना॑ ह॒विरिन्द्रि॑यम्।
नमु॑चेर्धिया सर॑स्वती।
आ शु॒क्रमा॑सुराद्व॒सु।
म॒घमिन्द्रा॑य ज॒भ्रिरे।
यम॑श्विना सर॑स्वती।
ह॒विषेन्द्र॑मवर्धयन्।
स वि॑भेद व॒लं म॒घम्।
नमु॑चावासुरे सचा॑।
तमिन्द्रं॑ प॒शवः॑ सचा॑।
अ॒श्विनो॒भा सर॑स्वती ॥ १ ॥

[[2-6-13-2]]

द॒धाना॑ अ॒भ्यनू॑षत।
ह॒विषा॑ य॒ज्ञमिन्द्रि॑यम्।
य इन्द्रं॑ इन्द्रि॒यं द॒धुः।
स॒विता॑ वरु॒णो भ॑गः।
स सु॒त्रामा॑ ह॒विष्पतिः॑।
यज॑मानाय सश्र॒त।
स॒विता॑ वरु॒णो द॑धत्।
यज॑मानाय दा॒शुषे॑।
आद॑त्त नमु॑चेर्वसु।
सु॒त्रामा॑ ब॒लमिन्द्रि॑यम् ॥ २ ॥

[[2-6-13-3]]

वरु॑णः क्ष॒त्तमिन्द्रि॑यम्।
भ॒गेन॑ स॒विता॑ श्रियम्।
सु॒त्रामा॑ यश॑सा ब॒लम्।
द॒धाना॑ य॒ज्ञमा॑शत।
अ॒श्विना॑ गोभिरिन्द्रि॑यम्।
अश्वे॑भिर्वी॒र्यं ब॒लम्।
ह॒विषेन्द्रं॑ सर॑स्वती।

यजमानमवर्धयन्।
ता नासत्या सुपेशसा।
हिरण्यवर्तनी नरा।
सरस्वती हविष्मती।
इन्द्र कर्मसु नोऽवत।
ता भिषजा सुकर्मणा।
सा सुदुघा सरस्वती।
स वृत्रहा शतक्रतुः।
इन्द्राय दधुरिन्द्रियम् ॥ ३ ॥
उभा सरस्वती बलमिन्द्रियं नरा षड् ॥ १३ ॥

[[2-6-14-1]]

देवं बर्हिः सरस्वती।
सुदेवमिन्द्रे अश्विना।
तेजो न चक्षुरक्षयोः।
बर्हिषा दधुरिन्द्रियम्।
वसुवने वसुधेयस्य वियन्तु यज।
देवीद्वारो अश्विना।
भिषजेन्द्रे सरस्वती।
प्राणं न वीर्यं नसि।
द्वारो दधुरिन्द्रियम्।
वसुवने वसुधेयस्य वियन्तु यज ॥ १ ॥

[[2-6-14-2]]

देवी उषासावश्विना।
भिषजेन्द्रे सरस्वती।
बलं न वाचमास्यै।
उषाभ्यां दधुरिन्द्रियम्।
वसुवने वसुधेयस्य वियन्तु यज।
देवी जोष्टी अश्विना।
सुत्रामेन्द्रे सरस्वती।

श्रोत्रं न कर्णयोर्यशः।
जोष्ट्रीभ्यां दधुरिन्द्रियम्।
वसुवने वसुधेयस्य वियन्तु यज ॥ २ ॥

[[2-6-14-3]]

देवी ऊर्जाहुती दुग्धे सुदुग्धे।
पयसेन्द्रं सरस्वत्यश्विना भिषजाऽवत।
शुक्रं न ज्योतिः स्तनयोरहुती धत्त इन्द्रियम्।
वसुवने वसुधेयस्य वियन्तु यज।
देवा देवानां भिषजां।
होताराविन्द्रमश्विनां।
वषट्कारैः सरस्वती।
त्वेषिं न हृदये मतिम्।
होतृभ्यां दधुरिन्द्रियम्।
वसुवने वसुधेयस्य वियन्तु यज ॥ ३ ॥

[[2-6-14-4]]

देवीस्तिस्त्रस्त्रो देवीः।
सरस्वत्यश्विना भारतीडां।
शूषं न मध्ये नाभ्याम्।
इन्द्राय दधुरिन्द्रियम्।
वसुवने वसुधेयस्य वियन्तु यज।
देव इन्द्रो नराशंसः।
त्रिवरूथः सरस्वत्याऽश्विभ्यामीयते रथः।
रेतो न रूपममृतं जनित्रम्।
इन्द्राय त्वष्टा दधदिन्द्रियाणि।
वसुवने वसुधेयस्य वियन्तु यज ॥ ४ ॥

[[2-6-14-5]]

देव इन्द्रो वनस्पतिः।
हिरण्यपर्णो अश्विभ्याम्।
सरस्वत्याः सुपिप्पलः।

इन्द्राय पच्यते मधु।
 ओजो न जूतिमृषभो न भामम्।
 वनसपतिर्नो दधदिन्द्रियाणि।
 वसुवने वसुधेयस्य वियन्तु यज।
 देवं बर्हिर्वारितीनाम्।
 अध्वरे स्तीर्णमश्विभ्याम्।
 ऊर्णम्रदाः सरस्वत्याः ॥ ५ ॥

[[2-6-14-6]]

स्योनमिन्द्र ते सदः।
 ईशायै मन्युः राजानं बर्हिषा दधुरिन्द्रियम्।
 वसुवने वसुधेयस्य वियन्तु यज।
 देवो अग्निः स्विष्टकृत्।
 देवान्यक्षद्यथायथम्।
 होताराविन्द्रमश्विनाम्।
 वाचा वाचः सरस्वतीम्।
 अग्निः सोमः स्विष्टकृत्।
 स्विष्ट इन्द्रः सुत्रामा सविता वरुणो भिषक्।
 इष्टो देवो वनसपतिः।
 स्विष्टा देवा आज्यपाः।
 इष्टो अग्निरग्निनाम्।
 होता होत्रे स्विष्टकृत्।
 यशो न दधदिन्द्रियम्।
 ऊर्मपचितिः स्वधाम्।
 वसुवने वसुधेयस्य वियन्तु यज ॥ ६ ॥
 द्वारो दधुरिन्द्रियं वसुवने वसुधेयस्य वियन्तु यज जोष्टीभ्यां दधुरिन्द्रियं वसुवने वसुधेयस्य वियन्तु यज
 होतृभ्यां दधुरिन्द्रियं वसुवने वसुधेयस्य वियन्तु यजैन्द्रियाणि वसुवने वसुधेयस्य वियन्तु यज सरस्वत्या
 वनस्पतिः षड् ॥ १४ ॥
 देवं बर्हिर्देवीद्वारो देवी उषासावश्विना देवी जोष्टी देवी ऊर्जाहुती देवा देवानां भिषजा
 वषट्कारैर्देवीस्तिस्त्रस्त्रो देवीः सरस्वती देव इन्द्रो नराशंसो देव इन्द्रो वनस्पतिर्देवं बर्हिर्वारितीनां देवो

अग्निः स्विष्टकृद्देवान् ॥

समिधाऽग्निं देवं बर्हिः सरस्वत्यश्विना सर्वं वियन्तु। द्वारस्तिस्त्रः सर्वं वियन्तु। अज इन्द्रमोजोऽग्निं परः सरस्वतीम्। नक्तपूर्वः सरस्वति। अन्यत्र सरस्वती। भिषक्पूर्वं दुहं इन्द्रियम्। अन्यत्र दधुरिन्द्रियम्। सौत्रामण्यां सुतासुती। अञ्जन्त्ययं यजमानः ॥

[[2-6-15-1]]

अग्निमद्य होतारमवृणीत।

अयं सुतासुती यजमानः।

पचन्पक्तीः।

पचन्पुरोडाशान्।

गृह्णन्ग्रहान्।

बन्धन्नश्विभ्यां छागं सरस्वत्या इन्द्राय।

बन्धन्त्सरस्वत्यै मेषमिन्द्रायाश्विभ्याम्।

बन्धन्निन्द्रायर्षभमश्विभ्यां सरस्वत्यै।

सूपस्था अद्य देवो वनस्पतिरभवत्।

अश्विभ्यां छागेन सरस्वत्या इन्द्राय ॥ १ ॥

[[2-6-15-2]]

सरस्वत्यै मेषेणेन्द्रायाश्विभ्याम्।

इन्द्रायर्षभेणाश्विभ्यां सरस्वत्यै।

अक्षंस्तान्मेदस्तः प्रति पचताऽग्रभीषुः।

अवीवृधन्त ग्रहैः।

अपातामश्विना सरस्वतीन्द्रः सुत्रामा वृत्रहा।

सोमान्सुराम्णाः।

उपो उक्थामदाः श्रौद्धिमदा अदन्।

अवीवृधन्ताङ्गुषैः।

त्वामद्यर्षं आर्षेयर्षीणां नपादवृणीत।

अयं सुतासुती यजमानः।

बहुभ्य आसंगतेभ्यः।

एष मे देवेषु वसुवार्या यक्ष्यत इति।

ता या देवा देवदानान्यदुः।

तान्यस्मा आ च शास्व।

आ च गुरस्व।

इषितश्च होतरसि भद्रवाच्याय प्रेषितो मानुषः।

सूक्तवाकाय सूक्ता ब्रूहि ॥ २ ॥

इन्द्राय यजमानः सप्त च ॥ १५ ॥

[[2-6-16-1]]

उशन्तस्त्वा हवामह आ नो अग्ने सुकेतुना।

त्व॑ सोम महे भगं त्व॑ सोम प्रचिकितो मनीषा।

त्वया हि नः पितरः सोम पूर्वे त्व॑ सोम पितृभिः संविदानः।

बर्हिषदः पितर आऽहं पितृन्।

उपहृताः पितरोऽग्निष्वात्ताः पितरः।

अग्निष्वात्तानृतुमतो हवामहे।

नराश॑सै सोमपीथं य आशुः।

ते नो अर्वन्तः सुहवा भवन्तु।

शं नो भवन्तु द्विपदे शं चतुष्पदे।

ये अग्निष्वात्ता येऽनग्निष्वात्ताः ॥ १ ॥

[[2-6-16-2]]

अ॑होमुचः पितरः सोम्यासः।

परेऽवरेऽमृतासो भवन्तः।

अधिब्रुवन्तु ते अवन्वस्मान्।

वान्यायै दुग्धे जुषमाणाः करम्मम्।

उदीराणा अवरे परे च।

अग्निष्वात्ता ऋतुभिः संविदानाः।

इन्द्रवन्तो हविरिदं जुषन्ताम्।

यदग्ने कव्यवाहन त्वमग्न ईडितो जातवेदः।

मातली कव्यैः।

ये तातृपुर्देवत्रा जेहमानाः।

होत्रावृधः स्तोमतष्टासो अर्कैः।

आऽग्ने याहि सुविदत्रैभिरवाङ्।

स॒त्यैः क॒व्यैः पि॒तृभिर्घ॑र्म॒सद्भिः ।
ह॒व्यवा॑ह॒मजरं॑ पुरु॒प्रियम् ।
अ॒ग्निं घृ॑तेन॒ ह॒विषा॑ स॒पर्यन् ।
उपा॑सदं क॒व्यवा॑हं पि॒तृणाम् ।
स नः॑ प्र॒जां वी॒रव॑ती॒ः समृ॑ण्वतु ॥ २ ॥
अन॑ग्निष्वात्ता॒ जेह॑मानाः स॒प्त च ॥ १६ ॥

[[2-6-17-1]]

होता॑ यक्ष॒दिड॑स्पदे ।
स॒मि॒धानं॑ म॒हद्य॑शः ।
सु॒षमि॑द्धं वरे॑ण्यम् ।
अ॒ग्निमि॑न्द्रं वयो॒धस॑म् ।
गा॒यत्रीं॑ छन्द॑ इन्द्रि॒यम् ।
त्र्य॒विं गां॑ वयो॒ दध॑त् ।
वे॒त्वाज्य॑स्य॒ होत॑र्यज ।
होता॑ यक्ष॒च्छुचि॑व्रतम् ।
तनू॑नपा॒तमु॑द्भिद॑म् ।
यं गर्भ॑मदि॒तिर्द॑धे ॥ १ ॥

[[2-6-17-2]]

शुचि॑मिन्द्रं वयो॒धस॑म् ।
उ॒ष्णिहं॑ छन्द॑ इन्द्रि॒यम् ।
दि॒त्यवा॑हं गां वयो॒ दध॑त् ।
वे॒त्वाज्य॑स्य॒ होत॑र्यज ।
होता॑ यक्ष॒दीडे॑न्यम् ।
ई॒डितं॑ वृ॒त्रह॑न्त॒मम् ।
इडा॑भिरी॒ड्यः॑ सहः ।
सोम॑मिन्द्रं वयो॒धस॑म् ।
अ॒नुष्टु॑भं छन्द॑ इन्द्रि॒यम् ।
त्रि॒वत्सं॑ गां वयो॒ दध॑त् ॥

[[2-6-17-3]]

वेत्वाज्यस्य होतर्यज।
होता यक्षत्सुबर्हिषदम्।
पूषणवन्तममर्त्यम्।
सीदन्तं बर्हिषि प्रिये।
अमृतेन्द्रं वयोधसम्।
बृहतीं छन्दं इन्द्रियम्।
पञ्चाविं गां वयो दधत्।
वेत्वाज्यस्य होतर्यज।
होता यक्षद्वचस्वतीः।
सुप्रायणा ऋतावृधः ॥ ३ ॥

[[2-6-17-4]]

द्वारो देवीर्हिरण्ययीः।
ब्रह्माणं इन्द्रं वयोधसम्।
पङ्क्तिं छन्दं इहेन्द्रियम्।
तुर्यवाहं गां वयो दधत्।
वेत्वाज्यस्य होतर्यज।
होता यक्षत्सुपेशसे।
सुशिल्पे बृहती उभे।
नक्तोषासा न दर्शते।
विश्वमिन्द्रं वयोधसम्।
त्रिष्टुभं छन्दं इन्द्रियम् ॥ ४ ॥

[[2-6-17-5]]

पष्ठवाहं गां वयो दधत्।
वेत्वाज्यस्य होतर्यज।
होता यक्षत्प्रचेतसा।
देवानामुत्तमं यशः।
होतारा दैव्या कवी।
सयुजेन्द्रं वयोधसम्।
जगतीं छन्दं इहेन्द्रियम्।

अ॒न॒द्वा॒हं गां वयो॑ द॒धत्।
वे॒त्वा॒ज्य॑स्य॒ हो॒त॒र्य॒ज।
हो॒ता य॒क्ष॒त्पे॒श॑स्वतीः ॥ ५ ॥

[[2-6-17-6]]

ति॒स्रो दे॒वीर्हि॑र॒ण्य॒यीः।
भा॒र॒तीर्बृ॑ह॒तीर्म॒हीः।
पति॑मिन्द्रं वयो॒धस॑म्।
वि॒राजं॑ छन्द॑ इ॒हेन्द्रि॑यम्।
धे॒नुं गां न वयो॑ द॒धत्।
वे॒त्वा॒ज्य॑स्य॒ हो॒त॒र्य॒ज।
हो॒ता य॒क्ष॒त्सुरे॑त॒सम्।
त्व॒ष्टारं॑ पु॒ष्टि॒वर्ध॑नम्।
रू॒पाणि॑ वि॒भ्रतं॑ पृथक्।
पु॒ष्टिमिन्द्रं॑ वयो॒धस॑म् ॥ ६ ॥

[[2-6-17-7]]

द्वि॒पदं॑ छन्द॑ इ॒हेन्द्रि॑यम्।
उ॒क्षाणं॑ गां न वयो॑ द॒धत्।
वे॒त्वा॒ज्य॑स्य॒ हो॒त॒र्य॒ज।
हो॒ता य॒क्ष॒च्छ॒त॒क्र॒तुम्।
हि॒रण्य॑पर्णमु॒क्थिन॑म्।
र॒शनां॑ वि॒भ्रतं॑ व॒शिम्।
भ॒गमिन्द्रं॑ वयो॒धस॑म्।
क॒कुभं॑ छन्द॑ इ॒हेन्द्रि॑यम्।
व॒शां वे॒हतं॑ गां न वयो॑ द॒धत्।
वे॒त्वा॒ज्य॑स्य॒ हो॒त॒र्य॒ज।
हो॒ता य॒क्ष॒त्स्वाहा॑कृतीः।
अ॒ग्निं गृ॒ह॒पतिं॑ पृथक्।
वरु॑णं भेष॒जं क॒विम्।
क्ष॒त्तमिन्द्रं॑ वयो॒धस॑म्।

अतिच्छन्दसं छन्दं इन्द्रियम्।

बृहदृषभं गां वयो दधत्।

वेत्वाज्यस्य होतर्यज ॥ ७ ॥

दधे दधदृतावृध इन्द्रियं पेशस्वतीर्वयोधसं वेत्वाज्यस्य होतर्यजं सप्त च ॥ १७ ॥

इडस्पदैऽग्निं गायत्रीं त्र्यविम्। शुचिव्रतं शुचिमुष्णिहं दित्यवाहम्। ईडेऽन्यं सौममनुष्टुभं त्रिवत्सम्।
सुबर्हिषदमृतेन्द्रं बृहतीं पञ्चाविम्। व्यचस्वतीः सुप्रायणा द्वारो ब्रह्माणः पङ्क्तिमिह तुर्यवाहम्। सुपेशसे
विश्वमिन्द्रं त्रिष्टुभं पष्ठवाहम्। प्रचेतसा सयुजेन्द्रं जगतीमिहानद्वाहम्। पेशस्वतीस्तिस्त्रो भारतीः पतिं
विराजमिह धेनुं न। शतक्रतुं भगमिन्द्रं ककुभमिह वशां वेहतं गां न। स्वाहाकृतीः क्षत्तमतिच्छन्दसं
बृहदृषभं गां वयः। इन्द्रियमृषिवसुनवदशेहैन्द्रियमष्टं नव दश गां न वयो दधत्सर्ववेतु ॥

[[2-6-18-1]]

समिद्धो अग्निः समिधा।

सुषमिद्धो वरैण्यः।

गायत्री छन्दं इन्द्रियम्।

त्र्यविर्गोर्वयो दधुः।

तनूनपाच्छुचिव्रतः।

तनूनपाच्च सरस्वती।

उष्णिक्छन्दं इन्द्रियम्।

दित्यवाङ्गोर्वयो दधुः।

इडाभिरग्निरीड्यः।

सोमो देवो अमर्त्यः ॥ १ ॥

[[2-6-18-2]]

अनुष्टुप्छन्दं इन्द्रियम्।

त्रिवत्सो गोर्वयो दधुः।

सुबर्हिरग्निः पूषण्वान्।

स्तीर्णबर्हिरमर्त्यः।

बृहती छन्दं इन्द्रियम्।

पञ्चाविर्गोर्वयो दधुः।

दुरो देवीर्दिशो महीः।

ब्रह्मा देवो बृहस्पतिः।

पङ्क्तिश्छन्द इहेन्द्रियम्।
तुर्यवाङ्गौर्वयो दधुः ॥ २ ॥

[[2-6-18-3]]

उषे यही सुपेशसा।
विश्वे देवा अमर्त्याः।
त्रिष्टुप्छन्द इन्द्रियम्।
पष्ठवाङ्गौर्वयो दधुः।
दैव्या होतारा भिषजा।
इन्द्रेण सयुजा युजा।
जगती छन्द इहेन्द्रियम्।
अनङ्गान्गौर्वयो दधुः।
तिस्र इडा सरस्वती।
भारती मरुतो विशः ॥ ३ ॥

[[2-6-18-4]]

विराट् छन्द इहेन्द्रियम्।
धेनुगौर्न वयो दधुः।
त्वष्टा तुरीपो अद्भुतः।
इन्द्राग्नी पुष्टिवर्धना।
द्विपाच्छन्द इहेन्द्रियम्।
उक्षा गौर्न वयो दधुः।
शमिता नो वनस्पतिः।
सविता प्रसुवन्मगम्।
ककुच्छन्द इहेन्द्रियम्।
वशा वेहद्रौर्न वयो दधुः।
स्वाहा यज्ञं वरुणः।
सुक्षत्रो भेषजं करत्।
अतिच्छन्दाश्छन्द इन्द्रियम्।
बृहदृषभो गौर्वयो दधुः ॥ ४ ॥
अमर्त्यस्तुर्यवाङ्गौर्वयो दधुर्विशो वशा वेहद्रौर्न वयो दधुश्चत्वारि च ॥ १८ ॥

[[2-6-19-1]]

वसन्तेनर्तुना देवाः ।
वसवस्त्रिवृता स्तुतम् ।
रथन्तरेण तेजसा ।
हविरिन्द्रे वयौ दधुः ।
ग्रीष्मेण देवा ऋतुना ।
रुद्राः पञ्चदशे स्तुतम् ।
बृहता यशसा बलम् ।
हविरिन्द्रे वयौ दधुः ।
वर्षाभिर्ऋतुनाऽऽदित्याः ।
स्तोमे सप्तदशे स्तुतम् ॥ १ ॥

[[2-6-19-2]]

वैरूपेण विशौजसा ।
हविरिन्द्रे वयौ दधुः ।
शारदेनर्तुना देवाः ।
एकविंश ऋभवः स्तुतम् ।
वैराजेन श्रिया श्रियम् ।
हविरिन्द्रे वयौ दधुः ।
हेमन्तेनर्तुना देवाः ।
मरुतस्त्रिणवे स्तुतम् ।
बलेन शकरीः सहः ।
हविरिन्द्रे वयौ दधुः ।
शैशिरेणर्तुना देवाः ।
त्रयस्त्रिंशोऽमृतं स्तुतम् ।
सत्येन रेवतीः क्षत्रम् ।
हविरिन्द्रे वयौ दधुः ॥ २ ॥
स्तोमे सप्तदशे स्तुतं सहौ हविरिन्द्रे वयौ दधुश्चत्वारि च ॥ १९ ॥
वसन्तेन ग्रीष्मेण वर्षाभिः शारदेन हेमन्तेन शैशिरेण षट् ॥

[[2-6-20-1]]

दे॒वं ब॒र्हि॒रिन्द्रं॑ वयो॒धस॑म्।
दे॒वं दे॒वम॑वर्धयत्।
गा॒य॒त्रि॒या छ॒न्द॑सेन्द्रि॒यम्।
तेज॒ इन्द्रे॑ वयो॒ दध॑त्।
व॒सु॒वने॑ व॒सु॒धेय॑स्य वे॒तु य॑ज्।
दे॒वीर्द्वारो॑ दे॒वमिन्द्रं॑ वयो॒धस॑म्।
दे॒वीर्दे॒वम॑वर्धयन्।
उ॒ष्णि॒हा छ॒न्द॑सेन्द्रि॒यम्।
प्रा॒णमिन्द्रे॑ वयो॒ दध॑त्।
व॒सु॒वने॑ व॒सु॒धेय॑स्य वियन्तु॒ यज॑ ॥ १ ॥

[[2-6-20-2]]

दे॒वी दे॒वं वयो॒धस॑म्।
उ॒षे इन्द्र॑मवर्धताम्।
अ॒नु॒ष्टु॒भा छ॒न्द॑सेन्द्रि॒यम्।
वा॒चमिन्द्रे॑ वयो॒ दध॑त्।
व॒सु॒वने॑ व॒सु॒धेय॑स्य वी॒तां य॑ज्।
दे॒वी जो॒ष्टी दे॒वमिन्द्रं॑ वयो॒धस॑म्।
दे॒वी दे॒वम॑वर्धताम्।
बृ॒ह॒त्या छ॒न्द॑सेन्द्रि॒यम्।
श्रो॒त्रमिन्द्रे॑ वयो॒ दध॑त्।
व॒सु॒वने॑ व॒सु॒धेय॑स्य वी॒तां य॑ज् ॥ २ ॥

[[2-6-20-3]]

दे॒वी ऊ॒र्जाहु॑ती दे॒वमिन्द्रं॑ वयो॒धस॑म्।
दे॒वी दे॒वम॑वर्धताम्।
प॒ङ्क॒या छ॒न्द॑सेन्द्रि॒यम्।
शु॒क्रमिन्द्रे॑ वयो॒ दध॑त्।
व॒सु॒वने॑ व॒सु॒धेय॑स्य वी॒तां य॑ज्।
दे॒वा दै॒व्या॒ हो॒ता॒रा दे॒वमिन्द्रं॑ वयो॒धस॑म्।
दे॒वा दे॒वम॑वर्धताम्।

त्रिष्टुभा छन्दसेन्द्रियम्।
त्विषिमिन्द्रे वयो दधत्।
वसुवने वसुधेयस्य वीतां यज ॥ ३ ॥

[[2-6-20-4]]

देवीस्त्रिस्तस्त्रो देवीर्वयोधसम्।
पतिमिन्द्रमवर्धयन्।
जगत्या छन्दसेन्द्रियम्।
बलमिन्द्रे वयो दधत्।
वसुवने वसुधेयस्य वियन्तु यज।
देवो नराशंसो देवमिन्द्रं वयोधसम्।
देवो देवमवर्धयत्।
विराजा छन्दसेन्द्रियम्।
रेत इन्द्रे वयो दधत्।
वसुवने वसुधेयस्य वेतु यज ॥ ४ ॥

[[2-6-20-5]]

देवो वनस्पतिर्देवमिन्द्रं वयोधसम्।
देवो देवमवर्धयत्।
द्विपदा छन्दसेन्द्रियम्।
भगमिन्द्रे वयो दधत्।
वसुवने वसुधेयस्य वेतु यज।
देवं बर्हिर्वारितीनां देवमिन्द्रं वयोधसम्।
देवो देवमवर्धयत्।
ककुभा छन्दसेन्द्रियम्।
यश इन्द्रे वयो दधत्।
वसुवने वसुधेयस्य वेतु यज।
देवो अग्निः स्विष्टकृद्देवमिन्द्रं वयोधसम्।
देवो देवमवर्धयत्।
अतिच्छन्दसा छन्दसेन्द्रियम्।
क्षत्तमिन्द्रे वयो दधत्।

वसुवने वसुधेयस्य वेतु यज ॥ ५ ॥

वियन्तु यज वीतां यज वीतां यज वेतु यज वेतु यज पञ्च च ॥ २० ॥

देवं बर्हिर्गायत्रिया तेजः। देवीद्वार उष्णिहा प्राणम्। देवी देवमुषे अनुष्टुभा वाचम्। देवी जोष्टी बृहत्या श्रोत्रम्। देवी ऊर्जाहुती पङ्गा शुक्रम्। देवा दैव्या होतारा त्रिष्टुभा त्विषिम्। देवीस्तिस्त्रस्तिस्त्रो देवीः पतिं जगत्या बलम्। देवो नराशंसौ विराजा रेतः। देवो वनस्पतिर्द्विपदा भगम्। देवं बर्हिवारितीनां ककुभा यशः। देवो अग्निः स्वष्टकृदतिच्छन्दसा क्षत्रम्। वेतु वियन्तु चतुर्वीतामेको वियन्तु चतुर्वेतु।

अवर्धयदवर्धयः श्वतुरवर्धतामेकोऽवर्धयः श्वतुरवर्धयत् ॥

स्वाद्धीं त्वा सोमः सुरावन्तः सीसेन मित्रोऽसि यद्देवा होता यक्षत्समिधेन्द्रः समिद्ध इन्द्र आचर्षणिप्रा देवं बर्हिरिन्द्रः सुदेवः होता यक्षत्समिधाऽग्निः समिद्धो अग्निरश्विनाऽश्विना हविरिन्द्रियं देवं बर्हिः सरस्वत्यग्निमद्योशन्तो होता यक्षदिडस्पदे समिद्धो अग्निः समिधा वसन्तेन देवं बर्हिरिन्द्रं वयोधसं विंशतिः ॥ २० ॥

स्वाद्धीं त्वाऽमी मदन्त पितरः साम्राज्याय पूतं पवित्रेणैवाज्यमुषासानक्ता बर्हिरैरधातामश्विना देव इन्द्रो वनस्पतिः पष्ठवाहं गां देवी देवं वयोधसं चतुर्नवतिः ॥ ९४ ॥